

CARTA JEE NI TEE SAN PABLO APOSTOL NUU ÑAYUU GALACIA

1 Máá rí cúu Pablo apóstol. Te nasūu ñáyuu ni jéni ruhū ni nasūu ñáyuu ni tájí ruhū jeē nácani ri jnūhun, chi sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndáyí. ²Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñáyuu cácandíje níi región Galacia. ³Te cáñuhun ni rī jeē Tátá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo siñ ni rō. ⁴Chi Jesús ni socō yā maá yá jeē ni jíihí yā jeē siquí cuéchi yó, návaha jnama ya yohó núu táca jéē neé íyó ñayívi yáha, chi súcuan ni nujnahan ni maá Tátá yō Yaā Dios. ⁵Jeē yúcuan na cáhán yō jeē yóhyo luu cújéhnu ya níi cáni. Súcuan na coo. Amén.

Siquí jeē tuá na inga jnūhun cācu ñayuu

⁶Te nánhán náā ni rī jíto ri jeē yóhyo yachī cánducú ró stóo ró Yaā Dios, Yaā ní cana rōhó jéē quívi ró ndaha ya siquí jeē cundáhú ni Cristo yohó. Chi ni candiquin rō inga jnūhun jeē síin cáhán. ⁷Te tú cuítí na inga jnūhun jnama yóhó

íyó. Te cáhīyo jecu ñayuu castáhān i rōhó, te cácuni i nasama i jnūhun ndese jnáma Cristo yohó. ⁸Te núu ñin ñayuu nacani inga jnūhun nuū rō ndese jnáma ya rohó, te núu tu quíjnáhan jíin jnúhun ni canacani ri nuū rō xihna gā, na jnáhnú ndetū ñayuu ún. Te vēsú maá rí chí ñin ndajéhé jeē quíji nde andiví nacani inga jnūhun núu, na jnáhnú ndetū. ⁹Je ni cahán rī jíin ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnáhan jíin jnúhun jeē ní cajetáhú ró, na jnáhnú ndetū tēe ún. ¹⁰Te jeē cahán rī súcuan, íá ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsiñ ni ñayuu jíin rí, cájeni ni rō? Núu ndúcú gá rī jeē cúsiñ ni ñayuu jíin rí, te nasūu mozo Cristo cúu ri núu súcuan.

Ndese ni jinū Pablo cúu de apóstol

¹¹Te cástūhun rí nuū rō, hermano jíjnáhan ró, jéē jnúhun jnáma ya yohó jéē nácani ri, nasūu jéē ní jeni ni maá rí jíin ñáyuu cúu. ¹²Chi nasūu ñáyuu ni stéén nuū rī, ni nasūu ñáyuu ní sáha jeē ní cutūhva ri, chi sa suhva máá Jesucristo ni steén nuū rī.

¹³Chi je ni cajini jñuhun ró ndese ni sáha ri nde saá, ná ni chiñúhún rí sahān jñāhan ri ñayuu hebreo. Te cājini rō jeē yóhō ni jito xeēn rī ñayuu cácanđije nuū Yaā Dios, te ni condihvī ni rī snāā rī i núu. ¹⁴Te vāha ga ni cutūhva ri sahān ún vēsú cuehē gā tēe naciōn rī jeē ní cajehnu jíin rí, chi ni condihvī gā ni rī siquī tāca jēē ní cajequin jíi rī. ¹⁵Te vēsú súcuan te Yaā Dios je ni nacāji ya ruhū nde ná tu cacu ri, te ĩin quivī te ni cusīi ni yā ni cana ya ruhū jeē quívi ri ndaha ya, siquī jeē yóhō ni cundáhú ni yā ruhū. ¹⁶Te ni steén yā Sēhe ya nuū rī, návāha nacani ri jñuhun ndese jñāma ya ñayuu tācā naciōn jeē tu jíin jñuhun ya. Yūcuán na te tu ní cājñuhun rí ni ĩin ñayuu, ¹⁷ni tu ní jéhēn rī ñuu Jerusalén nuū tēe cácuu apóstol xihna gā vēsú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

¹⁸Yūcuán na te nde ni yāha unī cuiyā, te ni jehēn rī Jerusalén. Te ni jíin jñāhan ri jíin Pedro, te ni condee rī jíin de xahūn-ni quivī. ¹⁹Te tu ní jíto ri nuū tāca gā apóstol, chi máá ĩin-ni nuū Jacobo ñani maá Jítóho yō. ²⁰Jñuhun yāha jēē tēe ri cuajeē nuū rō, chi jíin Yaā Dios jeē ndaā cúu.

²¹Yūcuán na te ni jehēn rī níi región Siria jíin Cilicia. ²²Te ñayuu cácanđije jeē yíhi ndaha Cristo, jeē cáyucú región Judea, ná tu coto cuiti i nuū rī saá. ²³Chi máni jñuhun-ni ni cajini i cácahān ñayuu: Tēe ni jito xeēn yohó ndé saá, vijna chi nácani de jñuhun cándije yó jēē ní nducú de snāā de nde saá, áchí i.

²⁴Te ni cacahān i jeē yóhō cújéhnu Yaā Dios jeē súcuan ni sáha ya jíin rí.

Jeē ní cajetáhú tāca gā apóstol un Pablo

2 Yūcuán na te nde nuū uxí cuūn cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rí. ²Te ni jehēn rī chi máá Yaā Dios ni steén yā jeē jíin ñuhūn quihīn rī. Te ni candutútú sīin nene tēe cácujuhnu nuū ñayuu cácanđije ún. Te ni castūhun rí nuū de siquī jñuhun jñāma ya yohó jēē nácani ri nuū ñayuu tācā naciōn tu jíin jñuhun ya. Te súcuan ni sáha ri návāha cuajñuhūn de jniñu ri, te ma quéndōo cāhá jniñu sáha ri jíin jēē ni sáha ri. ³Te ni tu ní cásáha fuerza de Tito, tēe ni jica jíin rí, jeē cóndee jñunī circuncidar de, vēsú nasūu tēe hebreo cúu de. ⁴Te súcuan ni cundaā, vēsú ni quivicoo jecu tēe stáhú jēē sáha de jeē hermano cácuu de. Te tēe un ní quivicoo de návāha yuhu-ni coto de ndese ni ndulibre yō nuū ley circuncidar siquī jeē yíhi yó ndaha Cristo Jesús. Chi cácuu de jeē squícu tucu yó ley un, nduu tucu yó mozo nuū ley un. ⁵Te tu ní cájetáhú cuiti rī nuū tēe ún, chi cúní rī jeē quéndōo ñihin ró jíināhan ró jíin jñuhun jñāma ya yohó.

⁶Te máá tēe cácujuhnu nuū ñayuu cácanđije ún, tuá na inga jniñu jēē ní cándacu de nuū rī. Te máá rí chi tu ní chíhi ri cuenta siquī jeē cácujuhnu de, chi suni Yaā Dios tu sáha ya cuenta, chi inuū-ni cúu ndivii tēe nuū yā. ⁷Chi sa suhva

ni cajini de jeē jnúhun jnáma ya yohó, ndíso jniñu ri nacani ri nuū ñáyuu tācá nación jeē tu cásáha circuncidar, nájnūhun nácani Pedro jnūhun un núu ñáyuu hebreo jeē casáha circuncidar. ⁸Chi Yaā Dios jeē ní tají Pedro jeē nácani de jnūhun nuū ñáyuu hebreo, suni máá yá ni tají rúhū jeē nácani ri jnūhun nuū ñáyuu tācá nación tu jíní jnūhun ya.

⁹Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñayuu cácañdije jeē maá de cácajéhu ga. Te ni cajniñi de ndaha ri jíin ndaha Bernabé, jeē ní castéén de jeē cáhiyo manī de jíin rí, jíin jéē ní cacundaā ni de jeē maá rí quingōo nacani jnūhun nuū ñáyuu tāca gá nación, te máá de jíjnáhan de nuū ñáyuu hebreo. ¹⁰Te máá ñin-ni jeē ní cajicān de cúu jeē cónahán rí chindéé ñáhán rí ñayuu cándoho ndáhú, te jniñu ún je ni condihvī ni rī ni sáha ri.

Jeē ni cáhān Pablo nuū Pedro

¹¹Te ná ni quiji Pedro ñuu Antioquía, te ni cahān cají rí nuū de, chi ni stívi de jniñu. ¹²Chi nde ná tu quecoo sava jnáhan de hebreo jeē ní tají Jacobo, te yéji de staā jíin ñáyuu jeē násúu hebreo cácuu. Yūcuán na te nuū ní quecoo tēe ún, te ni cusíin de jeē tuá yéji de jíin i, chi yúhú de jeē cúni tāca tēe un jéē tuá squícu de ley jnáhan de hebreo. Chi áchí ley jeē ma cúu cají de staā jíin ñáyuu jeē tu cásáha circuncidar. ¹³Te sava ga tēe hebreo jeē cácañdije, suni ni cacujiyo de nuū i, nájnūhun ni sáha Pedro, chi

cáyūhú de jeē cúni tēe ún. Te nde máá Bernabé ni cascáhán de ni cujiyo. ¹⁴Yūcuán na te ni jini ri jeē ní canayūhú de caji de staā jíin ñáyuu ún, cúu jeē tuá jíca de jíin modo jeē cahán jnūhun jnáma ya yohó. Te ni cahān rī nuū Pedro, jíto jíinúu tācá de: Róhó jéē cúu tēe nación yō hebreo, tuá squícu ró ley jnáhan yō hebreo, chi yéji rō jíin ñáyuu ún. ¿Te najehē safuerza rō i jeē squícu i ley jnáhan yo hebreo núu súcuan? ni achi rī.

Ñin-ni modo jnáma ya ñayuu hebreo jíin táca gá nación

¹⁵Te yohó chi cúu yó ñáyuu hebreo, te cácahān yō jeē násūu ñáyuu tāca gá nación casáha cuēchi cácuu yó. ¹⁶Te vēsú súcuan te jíin yō jeē ní ñin yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi máá jéē candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návaha ndahva yā cuēchi yó síquī jeē candíje yó, nasūu jíin jéē nducú yó squícu yó ley un. Chi áchí tutu i: Ni ñin ñayuu ma quéndōo ndaā i nuū Yaā Dios jíin jéē nducú i squícu i jniñu jeē ndácu ley, achi.

¹⁷Te máá yó ñayuu hebreo, núu cúni yō jeē ndahva Yaā Dios cuēchi yó síquī jeē ni jíhi Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájnūhun tāca gá ñayuu. Núu súcuan ¿te á cuēchi ni sáha yó jeē ni stóo yó ley jenahán ná ni candíje yó Cristo? Tú cuiti jeē súcuan. ¹⁸Chi sa núu naquihin tucu yó ley jeē ni stóo yó un, te súcuan

tée yó cuéchi siquī maá yó. ¹⁹Chi ruhū, nájnūhun ni jihī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios. ²⁰Chi nájnūhun je ni jihī rī jicā cruz jíin Cristo, te vijna chi tuá técu rī jeē maá rí, chi máá Cristo cúu jeē técu ini rī. Te jeē técu rī ini ñayīvi yáha vijna cúu jeē candíje ri jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socó yā maá yá jehē rī. ²¹Núu súcuan te tu cúní rī casi rī nuū jnúhun jeē ndáhva Yaā Dios cuéchi yó síquī jeē yóhyo vāha ni yā jíin yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjnīñu jeē ni jíhī Cristo nuú.

Jnúhun ley jíin jnúhun cándíje

3 Róhó hermano ñuu Galacia, ¿naun tu cájecūhun ni rō? ¿Ndé tée ni saca núu xinī rō jeē tuá cájetáhú ró jnúhun ndaā? Chi ná ni canacani ri jnúhun ya nuū rō, te cájí ndasí ni cajecūhun ni rō jeē ni jíhī Jesucristo jicā cruz jehē rō. ²Īn-ni jnúhun yáha cájnūhun rī rohó: ¿Ndese ni canihīn rō Espírítu Santo? ¿A jéē ní cacundeyí ró squícu ró jniñu ndácu ley Moisés? Tú cuiti, chi jeē ní cacandíje ró jnúhun jnáma ya rohó jéē ní cajini sōho ró. ³¿Ndese cúu jeē tu cájecūhun cuiti ni rō? Chi xihna gā ni cacandíje ró jéē ni jíhī Cristo jeē jnama ya rohó, te ni canihīn rō Espírítu. Te vijna ¿á cájeni ni rō jeē stóo ró jnúhun ún te fuerza maá ró squícu ró ley un, te cācu ró naún? ⁴Núu súcuan te tu ndé ní jéjnīñu

cuiti jeē ní castóho ñayuu rohó síquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē váha te núu jeē tu ní castóo ró, chi sa cácandíje ndije ró yá. ⁵¿Te na siquī cúu jeē jéhe Yaā Dios Espírítu yā nuū rō te sáha ya jniñu jéhnu mēhñu ró? Tu sáha ya siquī jeē cánducú ró squícu ró ley un, chi siquī jeē ní cacandíje ró jnúhun jnáma ya rohó jéē ní cajini sōho ró.

⁶Abraham ni candíje de jeē sáha Yaā Dios jeē ni jéjnūhun ya, te jeē yúcuan ní ndahva yā cuéchi de. ⁷Núu súcuan te na jécūhun ni rō jijnáhan ró jéē ñáyuu cácandíje jeē sáha Yaā Dios jehē i, ndívi i yucūn Abraham siquī jeē súcuan cácandíje i. ⁸Chi nde jenahán je cáhán tutu i i jeē ñáyuu tācá nación tu jíin jnúhun Yaā Dios, ndahva yā cuéchi i núu candíje i ún. Te nde ná tu cuu tāca jéē yáha te je ni jejnūhun ya jnúhun vāha yáha nuū Abraham: Jeē rohó cúu jeē quendōo ndetū ñayuu tācá nación. ⁹Núu súcuan te ñayuu cácandíje, quéndōo ndetū i jíin Abraham, tēe ni candíje jeē ni jéjnūhun ya.

¹⁰Te sa jnahnū ndetū ñayuu jeē cánducú i quendōo ndaā i jeē jíin ley Moisés. Chi súcuan yósó núu tútu ii: Jnahnū ndetū tāca ñáyuu jeē tu squícu ndíhi cuiti jnúhun yósó núu tútu ley, achí. ¹¹Núu súcuan te cájí cúu jeē ni ĩin ñayuu ma quéndōo ndaā i nuū Yaā Dios siquī jeē nducú i squícu i ley un. Chi cáhán tutu: Ñayuu jeē ní ndahva yā cuéchi i, técu i jeē candíje i jeē sáha ya jehē i, achí.

¹²Te ley Moisés tu cáhán jeē cótecu

yō ní cání siquī jeē candíje yó, chi sa suhva cáhán: Núu ndé ñayuu squícu jniñu yáha, te cotecu i sáha, áchí.

¹³Te Cristo ni jnama ya yohó núu jnūhun cáhán ley jeē jnahnú ndetū yō siquī cuéchi yó, chi máá yá ni ndoho siquī jnūhun jeē jnahnú ndetū yō. Chi yósó núu tutu i: Tāca ñayuu condita caa jicā yújnu, jnahnū ndetū i, áchí. ¹⁴Te Cristo Jesús ni jihí yā jicā yújnu cruz návāha quendōo ndetū ñayuu tācá nación sáha ya. Chi jnūhun jeē ni jéjnūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espírítu jeē ni jéjnūhun ya quiji.

Siquī ley jíin siquī contrato jeē ni jéjnūhun ya

¹⁵Hermano, na cáhán rī iin jnūhun ndese cásáha ñayuu ñayiví: Núu iin tēe sáha de iin contrato chí iin acta, te núu je ni cucutú ni sáha de firmar, te ma cúu ga najnanū, ni ma cúu jecosō gā. ¹⁶Te suni súcuan ni sáha Yaā Dios iin contrato jeē ni jéjnūhun ya nuū Abraham jíin yúcūn de jeē quíji. Te tu cáhán tutu i siquī cuehē yucūn de, chi sa cáhán siquī iin-ni yucūn de, te suu cúu Cristo. ¹⁷Núu súcuan te jnūhun jeē cahán rī yāha cúu jeē xihna gā ni sáha Yaā Dios iin contrato jíin Abraham, jeē quiji Cristo jnama ya yohó, te ni sácutú yá. Yūcuán na te ni yāha cuūn ciento ocō uxí cuiyā, te sáá te ni jēhe ya ley nuū Moisés. Te ley un jéé ní quee cueé gá, ma cúu nacanū contrato un, ni ma cúu casí nuū jnūhun jeē ni jéjnūhun

ya jeē jnama ya yohó. ¹⁸Chi núu jeē jíin ley Moisés jnama Yaā Dios ñayuu, yūcuán na te nasūu siquī contrato jeē ni jéjnūhun ya cúu. Chi sa suhva siquī máá jéé ni jéjnūhun Yaā Dios nuū Abraham cúu jeē ní jnama ya de.

¹⁹Núu súcuan ¿te ndese jéjnīñu ley Moisés? Jéjnīñu chi ni jēhe ya un cuéé gá návāha nastūu cuéchi i. Te ni ndacu jniñu máá-ni nde ná tu quiji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núu ñayuu, te ni tají yá tācá ndajéhé yā ni cacastūhun núu Moisés, te Moisés ni nacachí nuū i. ²⁰Te sīin cúu jnūhun jeē ni jéjnūhun ya nuū Abraham jeē quíji Cristo, chi máñúhún-ni ya ni jéjnūhun, te tu ní jíni ñúhún ni iin jeē nacachí nuū Abraham.

Siquī ndese jéjnīñu ley jenahán

²¹Núu súcuan ¿te á cúní cahán jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuíti jeē súcuan. Chi núu jeē ni jēhe Yaā Dios iin ley jeē cótecu ñayuu ní cání sáha, yūcuán na te quendōo ndaā i nuū yā siquī jeē squícu i jniñu ndácu ley un núu. ²²Te tuú chi yósó núu tútu i jeē ndíhi ñayuu ñayiví, nájnūhun yíndihyū i vecāa chí cáyihí i chíji cuéchi. Te súcuan cúu návāha tācá i jeē candíje i jeē ní jíhí Jesucristo jehē i, nihīn i máá jéé ni jéjnūhun ya nuū i siquī jeē candíje i ún.

²³Chi nde ná tu quee jnūhun candíje yó Cristo, te nájnūhun ni yíndihyū yō ni sáha ley jenahán, návāha condetu yó quíví quiji

Cristo, Yaā candíje yó. ²⁴Núu súcuan te ley ni cuu ñin jeē ndíto yóhó nájnūhun ñin mozo ndíto sūchi lúlí, te ni jejniñu nde quiví ní quiji Cristo, návāha candíje yó jéē ni jíhi yā jehē yō, te ndahva Yaā Dios cuēchi yó. ²⁵Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájnūhun mozo ndíto yóhó.

²⁶Chi ndivii rō cácuu sēhe Yaā Dios siquī jeē ní cacandíje rō Cristo Jesús. ²⁷Chi tāca rō jeē ní jendute rō síquī jeē ni quívi rō ndaha Cristo, ni sáha ya jeē ní nduu rō nájnūhun cúu máá yá. ²⁸Te vijna chi tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta maá, ni tēe ni ñahan. Chi ñin na cúu rō núu yā jeē cáyihí rō ndaha Cristo Jesús. ²⁹Te núu cáyihí rō ndaha Cristo, núu súcuan te yucūn Abraham cácuu ndije rō, te nihīn rō maá táhū jeē ni jéjnūhun ya.

4 Jeē cahán rī jíin rō jíjnáhan rō cúu jeē yáha: ñin sūchi chíí táhū, vēsú maá i naquihin ndíhi jeē névāha tátá i, te núu lúlí i chi ñnuú cúu i jíin mozo. ²Chi yíhi i ndaha tāca jéē ndíto i jíin jéē ndíto ndajniñu i, nde quee quiví jeē ní jeni tátá i, te sáá te nihīn i. ³Te suni súcuan yóhó, chi nde ná tu jecūhun ni yō siquī Cristo te ni cuu yó nájnūhun sūchi lúlí, te ni yíhi yó chíji tācá costumbre jeē ní cajequin ñayuu ñayiví. ⁴Te nde ná ni quee quiví jeē ní jeni Yaā Dios, te ni tají yá Sēhe ya, ni cacu ya chíji ñin ñahan, te ni cacu ya yucūn ñayuu nación hebreo jeē cáyihí chíji ley Moisés. ⁵Súcuan ni cacu ya návāha

jnama ya yohó jéē tuá quihí yó chíji ley un, te návāha naquihin Yaā Dios yohó cuu yó sēhe ya.

⁶Te siquī jeē cácuu rō sēhe ya, te ni tají Yaā Dios Espíritu Sēhe ya ni quiví ini anuá rō, te sáha ya jeē cácahān jee rō: Tátá maá ná. ⁷Núu súcuan te tuá cácuu rō nájnūhun mozo, chi sēhe ya cácuu rō. Te jeē cácuu rō sēhe Yaā Dios, te suni nihīn rō maá táhū jeē ni jéjnūhun ya jeē jíin Cristo.

Jeē nacani ni Pablo siquī ñayuu cacandíje

⁸Chi nde saá, nde ná tu jecūhun ni rō ndese Yaā cúu Yaā Dios, te ni cacu rō mozo nuū tāca jéē násūu yāā ndaā cúu. ⁹Te vijna chi je cájini rō ndese Yaā cúu ya, te vāha ga na cáhān rī jeē maá yá je jíin yā rohó. Núu súcuan ðte najehē cácuni rō nandió cóo rō nduu tucu rō mozo nuū tācá costumbre ñayuu ñayiví jéē tu níhín jniñu cuiti? ¹⁰Chi máni jeē cánēe ñi rō quiví jíin yóō jíin vico jíin cuíyā. ¹¹Te yúhú rí sanaa te tu ní jéjniñu cuiti jeē ní nacani ri jnūhun nuū rō.

¹²Cáhān ndahú rí jíin rō hermano, jeē na cáni ni rō nájnūhun jéni ni maá rí jeē tuá siquī ri costumbre ñayuu hebreo. Chi ruhū ni nasáha ri maá rí nájnūhun máá rō jeē tu ní cáyihí rō núu ley costumbre ñayuu hebreo. Te tú na vé ni casáha rō jéē cucuíhyá ni rī nde saá. ¹³Chi cájini rō ndese ni cuu ná ni nacani núu rí jnūhun nuū rō ndese jnáma ya yohó. Chi siquī jeē cuhú rī te ni jecuiñi rī ñuu rō ni nacani ri jnūhun. ¹⁴Te vēsú jnūndóho ni cuu jeē ní cocuhū rī, te tu ní casájéē ni rō nuū rī, ni

tu ní cásquéhichī ni rō ruhū. Chi sa ni cajetáhú ró ruhū nájñuhun jeē cúu ri ñin ndajéhé Yaā Dios, chí nájñuhun jeē cúu ri maá Cristo Jesús. ¹⁵Núu súcuan ¿te najehē cúu jeē tuá cácusī ni rō jíin rí vijna? Chi náhán rí jeē váha ni casáha ró jéē ní cajnahuhū ni rō núu jeē cúu te tava rō tinūu váha máá ró, cuāha ró nduu tinūu rí nuú. ¹⁶Te vijna ¿á ní nduu ri enemigo rō siquī jeē cachí rí máni jñuhun ndaā nuū rō, chí naún?

¹⁷Te cáhiyo tēe jeē cándihvī ni siquī rō jijnáhan ró, te nasūu jéē quéndōo váha ánuá rō, chi sa jeē cácuni de nasásñin de róhó jíin rúhū, návāha condihvī ni rō jeē cúu máá de. ¹⁸Te íyó váha jeē cándihvī ni de jehē rō, te núu jeē quéndōo váha ánuá rō cúu núú. Chi níni jíni ñúhún sáha de jeē váha róhó, vēsú núu íne ri jíin ró chí núu tú ri íne. ¹⁹Séhē mánī jijnáhan ró, jeē siquī rohó cúu jeē inga jínu jnáhuhū ni rí, chí nájñuhun ñin ñahan scácu sēhe, súcuan ndóho ri jehē rō. Te suu cúu jeē jnáhuhū ni rí ndétu ri jeē na ndúndaā anuá rō ndacu ró Cristo. ²⁰Nacā jeē váha núu jeē ndeé rí jíin ró vijna ñúhún, návāha cuu cahān maní rí jíin ró. Te tu cújñuní cuiti ni rí ndese ga cúu jeē cáni ni rí siquī rō.

Jñuhun yátá siquī Agar jíin Sara

²¹Róhó jíjñáhan ró jéē cácuni rō quíhi ró chíji ley Moisés, cachí nuū rí: ¿A tu ní cájini sōho ró ndese cáhán ley un? ²²Chi cáhán tutu ñi jeē Abraham ni iyo uū sēhe yíí de. Te ñin i cúu sēhe Agar, ñahan cúu mozo vehe de. Te inga i cúu sēhe

ñahan íyó libre, suu ñasihí de Sara jeē ní cuu ña ñahan numá. ²³Te sēhe ñahan cúu mozo, ni cacu i nájñuhun cácu tāca gá sūchi lúfí. Te sēhe ñahan cúu libre, ni cacu i máá siquī jeē súcuan ni jejnūhun Yaā Dios. ²⁴Te yāha cúu ñin jñuhun yátá, chí ndindúú ñahan un cúu ña nájñuhun ndindúú contrato jeē ni sáha Yaā Dios jíin ñayuu. Máá ñahan nání Agar, cúu ña nájñuhun contrato ley jeē véji nde yucu Sinaí. Te ñayuu cáyihí chíji contrato ley, cácuu i mozo nuū ley un. ²⁵Chi Agar cúu nájñuhun ley jeē ni jéhe Yaā Dios xiní yucu Sinaí jeē ñin nde Arabia. Te cúu ña nájñuhun Jerusalén, ñuu ñayuu hebreo, jeē iyó vijna, chí tāca sēhe ñuu Jerusalén, cácuu i nájñuhun mozo nuū ley un. ²⁶Te Jerusalén jeē iyó andiví, chí sa suhva íyó libre nájñuhun Sara. Te yóhó ñayuu cácandíje, nájñuhun sēhe un cácuu yó, chí íyó libre yō nuū contrato ley. ²⁷Chi suhva yósó nuū tútu ii:

Róhó jeē ní cuu ró ñahan numá jéē tú sēhe ró, na cúsi ni rō. Róhó jéē tu ní jéhnde chíji ró jéē scácu ró, na cána jee ró jéē cúsi ni rō.

Chi coo cuehē gā sēhe róhó jéē ní cuu ró ñahan numá vēsú ñahan jeē jé ni scácu sēhe.

Achí tutu.

²⁸Hermano, sēhe Yaā Dios cácuu yó, chí súcuan ni jejnūhun ya nuū yó, nájñuhun ni jejnūhun ya nuū Abraham jeē cacu sēhe de Isaac.

²⁹Te nde saá te inga sūchi ní cacu nájñuhun cácu tāca gá ñayuu, ni jito xeēn i Isaac, sūchi ní cacu ní sáha Espíritu. Te nájñuhun ni

īyo sáá, suni súcuan cájito xeēn ñayuu tāca séhe Yaā Dios nde vijna. ³⁰¿Te ndese cáhán tutu īi? Achí: Quenehen ró ñahan cúu mozo na quíhín ña jíin séhe ña. Chi séhe ñahan cúu mozo, ma nihín i tahū jíin séhe ñahan libre, achí yá jíin Abraham. ³¹Núu súcuan hermano, tu cúu yó nájñuhun séhe ñahan cúu mozo, chi nájñuhun séhe ñahan libre cúu yó.

**Na cuíñi nihin yó jíin jñuhun
jeē ni sáha libre yohó**

5 Te Cristo ni sáha libre yā yohó jeē tuá yíhi yó chíji ley Moisés. Núu súcuan te cuíñi nihin ró jíin jñuhun jeē ni sáha libre yā yohó, te ma ndáivicoo tucu ró cuu ró mozo nuū ley un.

²Sáha ró cuenta jijnáhan ró, chi ruhū Pablo cahán rī jíin ró jeē núu squícu ró ley circuncidar, yūcuán na te tu níhín jníñu cuítī jeē ní candíje ró jéē ni jíhi Cristo jehē rō.

³Te inga jínu cáhán nihin rī jíin táca téē cánducú cuu circuncidar, jeē núu súcuan te suni cánuú jéē squícu de ndívii cuítī gā jñuhun cáhán ley Moisés. ⁴Róhó jéē cánducú ró quendōo ndaā rō jeē squícu ró ley un, je ni casiáá rō Cristo núu súcuan. Je ni castóo ró jñuhun jeē ndahva yā cuēchi ró síquī jeē cundáhú ni Yaā Dios rohó. ⁵Te máá yó chí cájica yó jíin Espíritu, te cácandíje yó jéē ní ndahva yā cuēchi yó, te jeē yúcuan ñuhun ni yō jeē quendōo ndaā yō quivī cuíñi yó núu Yaā Dios. ⁶Chi yóhó jéē cáyíhi ndaha Cristo Jesús, vēsú núu jeē cúu yó circuncidar chí tu cúu yó, tú na vé níhín jníñu. Jeē

nihín jníñu cúu jeē candíje yó jeē sáha ya jehē yō. Te yúcuan sáha jeē cundáhú ni yō jnáhan yó.

⁷Vāha ni cacandíje ró núu. ¿Te ndé iin ni jesi jeē tuá cájetáhú ró jñuhun ndaā núu súcuan? ⁸Jñuhun jeē ní cascáhán de róhó, chí tú vēji nuū maá Yaā ní cana róhó ní quívicoo ró ndaha ya. ⁹Te ma náā ni rō jeē téē cástáhú róhó, jñuhun cástéén de cúu nájñuhun levadura, chí vēsú jecu-ni levadura, te ndāa ndíhi ñujen sáha. ¹⁰Te cúcáhnū ni rī jeē maá Jítoho yō sáha ya jeē ma cándíje ró jíjnáhan ró inga jñuhun jeē sīn cáhán. Te máá Yaā Dios cuāha ya castigo tēe jeē sáca núu xinī rō, núu na-ni tēe cúu de.

¹¹Te ruhū, hermano, núu jeē nácani ga rī jñuhun ley circuncidar nde vijna, te jnáhan rī ñayuu hebreo ma cóto xeēn i ruhū nuú. Chí ma quítī ni i jeē nácani rī jñuhun jeē ni jíhi Cristo jíicā cruz, núu jeē súni nácani rī jñuhun circuncidar nuú. ¹²Te tāca téē jeē sáca núu xinī rō síquī jñuhun ún, vāha ga na cáhnde gā de máá de núu súcuan.

¹³Chi máá ró jijnáhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cúu quívicoo ró táca cuēchi jeē cúu modo neé cúní maá ró, chí sa suhva na sáha ró máá ró mozo jeē chindéé ñáhán ró jnáhan ró síquī jeē cundáhú ni rō i. ¹⁴Chi je ni squícu ró ndíhi ley núu squícu ró iin-ni jñuhun ndácu jniñu yáha: Cundáhú ni rō jnáhan ró nájñuhun cundáhú ni rō maá ró, achí. ¹⁵Te núu máni jeē ndóna xeēn rō síquī jnáhan ró

jeē cuajnáhan ró, te coto ma snáā rō jniñu jeē ni sáha ya mēhñu rō jijnáhan ró.

**Modo cuní ñayuu tu cándíje
jín modo sáha Espíritu**

¹⁶Súcuan cáhán rī jín rō jijnáhan ró: Caca ró nájnūhun cuní maá Espíritu, te yūcuán na te ma sáha ga rō modo jeē cuní maá ró. ¹⁷Chi tāca jéē cuní maá yó, yūcuan jési nuū jeē cuní maá Espíritu. Te jeē cuní Espíritu, jési nuū modo neé jéē cuní maá yó. Te jeē ndíndúú yáha chí cájesi nuū jnáhan, te jeē yúcuán tu cúu sáha ró jniñu váha jeē cuní rō sáha ró. ¹⁸Te núu máá Espíritu steén nuū rō, núu súcuan te tuá cáyihí ró chíji ley jenahán.

¹⁹Te iyó ndijin tācá jniñu casáha ñayuu cájica jín modo neé máá, te yáha cúu: Cásíquí ndéē jnáhan i, casáha i jniñu jnéhén, casáha neé ndasí i. ²⁰Cáchiñúhún i ídolo, casáha tásí i, cájito uhū jnáhan i, cájeynáhan i, cácuquíñí ni i. Te yachí cáquití ni i, te cándíhvī ni i jeē cúu máá-ni i, te cátejnéhan i casásíin i máá i. ²¹Te cácuquésún ni i, cájehni i ndīyí, cánajīni i, casáha i vico neé, jín táca gá jeē súcuan. Te cáhán nihin rī jín rō, nájnūhun je ni cahān rī jín rō saá, jeē ñayuu casáha súcuan, ma nihín tahú i quīvicoo i ñuu nuū ndácu Yaā Dios jniñu.

²²Te ñayuu jeē nduú i jín Espíritu, táca jniñu yáha sáha ya jín i: Jeē cundáhú ni jnáhan, jeē cúsiñi ni, jeē iyó ndeyí síñi ni, jeē iyó paciencia, jeē maní ni, jeē váha ni, jeē squícu vāha, ²³jeē tu sáha jeē cujéhnū, jín jéē jési modo jeē cuní maá. Te tú

na ley cacān cuēchi siquī rō núu sáha ró táca jniñu yáha. ²⁴Te ñayuu cáyihí ndaha Cristo, nájnūhun je ni cajehni i modo neé máá i jicā cruz, nde jín táca jéē ndīyo neé ni i te cútíndí i. ²⁵Te jeē súcuan ni jēhe máá Espíritu iin vida jeē núu yō, te suni na cáca yó jín modo steén Espíritu.

²⁶Te ma sandúxí yó jéē squítí ni yō jnáhan yó, te ni ma cucuésún ni yō siquī jnáhan yó.

**Jnūhun jeē chindéé
ñáhán yó jnáhan yó**

6 Hermano, núu iin jnáhan ró ni sáha cuēchi, te rōhó jéē cájica jín Espíritu, na náchuhun ichí ró i. Te jín jnūhun vitá cahān rō jín i, te suni condito ró máá ró jeē ma cacān ini rō sáha ró táca cuēchi. ²Te chindéé ñáhán ró jnáhan ró núu na vé cúu jeē ndóho i, chí súcuan cúu jeē squícu ró ley Cristo.

³Chi núu iin ñayuu jéni ni i jeē ñayuu teyí cúu i, vēsú nasūu súcuan cúu, te stáhú i máá i núu súcuan. ⁴Te tācá iin iin ró na cóto ndee rō ndese cáa jniñu sáha ró. Te núu váha sáha ró, yūcuán na te cuu cusíñi ni rō jín jéē sáha máá ró, te tu níni jéē scáni jnáhan ró máá ró jín jnáhan ró. ⁵Chi tācá iin iin yó cánuú squícu yó jín jniñu ní jéhe ya nuū maá yó.

⁶Te rōhó jéē cascuáha jnūhun vāha ya, na chindéé ñáhán ró tēe cástéén nuū rō jín táca jéē váha cánevāha ró.

⁷Ma stívi ró cani ni rō jeē cuu sáha ró cuēchi. Chi ma cúu sácatā rō nuū Yaā Dios cani ni rō jeē tu

sáha ya cuenta. Chi tāca núu ndese sáha ñayuu, suu yūcuán nanihīn i. ⁸Chi ñayuu jeē sáha i jeē cuní modo neé máá i, nihīn i jeē jnahnú ndetū i sáha modo jeē cuní maá i ún. Te ñayuu jeē sáha jeē cuní maá Espíritu, chi nihīn i jeē cótecu i níí cáni andiví sáha Espíritu. ⁹Te ma cuíta yó jeē sáha yó jniñu váha núu súcuan, chi jeē queé maá quívī te nanihīn yō, te núu ma cuíta yó. ¹⁰Núu súcuan te tāca jínu jeē cúu sáha yó, te na sáha vāha yó jíín táca ñáyuu, te hermano yō jeē cácandíje cúu jeē cánuú gá.

Saludo jíín jnúhun cástūhun

Pablo jeē sándihí

¹¹Condēhe ró jeē náhnu letra tée ri cuajeē nuū rō jijnáhan ró, chi ndaha máá rí tée ri yāhá. ¹²Te tēe jeē casáfuerza de rōhó cuu ró circuncidar, cásáha de siquī jeē cácani de cuajnúhún ñáyuu de. Te cásáha de návāha ma cóto xeēn ñayuu de jeē cánacani de jnúhun jeē ni jíhī Cristo jehē yō. ¹³Te ni máá de jeē casáha de circuncidar, suni tu squícu vāha de ndihī ga ley jenahán. Te cácani de jeē cuu

ró circuncidar, návāha cuu sátéyí de máá de núu quihin ró jnúni circuncidar sáha de. ¹⁴Te ruhū tu cúní rī satéyí rí maá rí siquī ní ñn jeē yúcuan, chi máá ñn-ni siquī jeē ni jíhī Jitoho yō Jesucristo jicā cruz. Chi siquī yúcuan cúu nájnūhun ni jihī rī, chi ni siaá rī tāca jéé iyó ini ñayíví, te suni nájnūhun ñn ndíyí cúu ri nuū ñayíví. ¹⁵Chi núu yhī yó ndaha Cristo Jesus, te tu níhín jniñu núu cúu yó circuncidar chí tuú. Chi jeē níhín jniñu cúu jeē ní nasájeé yá anuá yō. ¹⁶Te ñúhun ni rī jeē tāca ró jeē jica ró jíín modo yáha, na sáha ga yā jeē coo ndeyí coo siī ni rō, te cundáhú ni yā rohó. Te suni ñúhun ni rī jeē súcuan sáha ya jíín táca gá i jeē cúu ndije i ñayuu cácandíje Yaā Dios.

¹⁷Te vijna jíín níí gá cuahān yō, cúní rī jeē ma stáhān gā ni ñn ñayuu ruhū. Chi yiquí cúñu rī ndíso seña jeē ni tújī rī ni ndoho ri jeē cúu ri mozo maá Jitoho yō Jesús.

¹⁸Hermano, ñúhun ni rī jeē na sáha ga Jitoho yō Jesucristo jeē vāha rōhó jíjnáhan ró. Súcuan na cóo. Amén.